

SIKAP LEWA DALAM PEKERJAAN

Muhammad Sallehudin bin Md Derus
Pusat Islam dan Pembangunan Insan
Universiti Malaysia Pahang
sallehudin@ump.edu.my

Perbezaan budaya kerja di sektor kerajaan dan juga swasta sering dikaitkan dengan jurang yang agak besar daripada sudut etika, komitmen dan sebagainya. Istilah “makan gaji buta” dan “biawak hidup” adalah perkataan-perkataan yang sentiasa bermain di kalangan masyarakat untuk pekerja-pekerja yang berada di sektor kerajaan.

Persoalannya, adakah stigma seperti ini akan berkekalan sehingga ke akhirnya? Di dalam konteks Islam, umat Islam diajar untuk sentiasa bekerja dengan penuh komitmen dan amanah seperti dalam firman Allah S.W.T dalam surah Al-Qasas ayat 26 yang bermaksud:

“Salah seorang di antara perempuan yang berdua itu berkata: Wahai ayah, ambillah dia menjadi orang upahan (mengembala kambing kita), sesungguhnya sebaik-baik orang yang ayah ambil bekerja ialah orang yang kuat, lagi amanah”.

Memetik petikan blog Ustaz Pahrol Muhamad Juoi maksud al-amin adalah mukmin juga dalam erti kata lain adalah seorang yang amanah dan maksud al-qawiy adalah profesional juga dalam erti kata lain adalah seorang yang kuat.

Pekerja yang cemerlang dan tidak lewa dalam pekerjaannya perlu sentiasa melakukan perkara ini :-

Pertama, pekerja mesti sentiasa proaktif dalam menyelesaikan sesuatu perkara atau masalah. Setiap kesusahan pasti ada kesenangan. Kita perlu sentiasa berusaha untuk selesaikan dengan tekun dan teliti agar kesilapan tidak berlaku. Kesilapan boleh terjadi bila-bila masa tetapi sebagai seorang Mukmin, dia tidak akan terjerumus ke dalam lubang kesilapan yang sama sebanyak dua kali seperti sabda Rasulullah s.a.w :

عَنْ أَبِي هُرَيْرَةَ عَنِ النَّبِيِّ صَلَّى اللَّهُ عَلَيْهِ وَسَلَّمَ - قَالَ « لَا يُلْدَغُ الْمُؤْمِنُ مِنْ جُحْرٍ وَاحِدٍ مَرَّتَيْنِ ». رواه البخاري.

Dari Abu Hurairah r.a., dari Nabi saw. beliau bersabda: “Seorang mukmin itu tidak akan terperosok ke dalam lubang yang sama dua kali.” (HR. Al-Bukhari).

Kedua, setiap pekerja perlu sentiasa memperbaharui niat dalam ikhlas melakukan pekerjaan. Niat yang betul akan menjadikan seseorang itu tidak tersangkut dengan penyakit serangkai hati iaitu suma'h , U'jub dan juga takbur.

Ketiga, setiap pekerja perlu bertanggungjawab terhadap diri sendiri dan juga anak buahnya. Pekerja yang bertanggungjawab tidak akan mudah untuk sentiasa menuding jari dan berlaku zalim dengan maksud yang lain meletakkan sesuatu kesalahan kepada orang yang tidak bersalah sepertimana dalam hadis Rasulullah s.a.w :

عَنْ ابْنِ عُمَرَ عَنِ النَّبِيِّ صَلَّى اللَّهُ عَلَيْهِ وَسَلَّمَ أَنَّهُ قَالَ « أَلَا كَلِّكُمْ رَاعٍ وَكَلِّكُمْ مَسْئُولٌ عَنْ رَعِيَّتِهِ فَالْأَمِيرُ الَّذِي عَلَى النَّاسِ رَاعٍ وَهُوَ مَسْئُولٌ عَنْ رَعِيَّتِهِ وَالرَّجُلُ رَاعٍ عَلَى أَهْلِ بَيْتِهِ وَهُوَ مَسْئُولٌ عَنْهُمْ وَالْمَرْأَةُ رَاعِيَةٌ عَلَى بَيْتِ بَعْلِهَا وَوَلَدِهِ وَهِيَ مَسْئُولَةٌ عَنْهُمْ وَالْعَبْدُ رَاعٍ عَلَى مَالِ سَيِّدِهِ وَهُوَ مَسْئُولٌ عَنْهُ أَلَا فَكَلِّكُمْ رَاعٍ وَكَلِّكُمْ مَسْئُولٌ عَنْ رَعِيَّتِهِ » رواه مسلم

Maksudnya: Daripada Ibnu Umar r.hma, daripada Nabi s.a.w, baginda bersabda: "Ketahuilah setiap daripada kamu adalah pemimpin, dan setiap daripada kamu akan diminta pertanggungjawaban terhadap apa yang dipimpin. Seorang raja adalah pemimpin bagi rakyatnya, dan dia akan diminta pertanggungjawaban terhadap yang dipimpin. Seorang suami adalah pemimpin bagi anggota keluarganya, dan dia akan diminta pertanggungjawaban terhadap mereka. Seorang isteri adalah pemimpin bagi rumah tangga, suami dan anak-anaknya, dan akan diminta pertanggungjawaban terhadap yang dipimpinnya. Seorang hamba adalah pemimpin bagi harta tuannya, dan dia juga akan diminta pertanggungjawaban terhadap apa yang dipimpinnya. Ketahuilah setiap kamu adalah pemimpin, dan setiap kamu akan diminta pertanggungjawaban atas apa yang kamu pimpin." (Riwayat Muslim)

Yang keempat, setiap pekerja perlu muhasabah dan sentiasa ada usaha untuk memperbaiki diri sendiri. Islam mengajar umatnya untuk sentiasa bertaubat apabila melakukan apa-apa kesalahan dengan sengaja atau tidak sengaja. Elakkan daripada sikap bodoh sombong tidak mengakui kesilapan diri sendiri dan lebih teruk berbangga dengan kesalahan yang dilakukan.

Kesimpulannya, pekerja yang baik adalah pekerja yang sentiasa memberikan manfaat kepada orang lain tanpa mengharapkan apa-apa balasan. Rasulullah S.A.W berpesan di dalam sabdanya :

«خَيْرُ النَّاسِ أَنْفَعُهُمْ لِلنَّاسِ»

رواه الطبراني

“Sebaik-baik manusia adalah yang paling bermanfaat bagi orang lain.”

(Riwayat ath-Thabrani)